



REPUBLIKA E SHQIPËRISË
AUTORITETI I KONKURENCËS
KOMISIONI KONKURENCËS

Nr. 492/prot.
11

Tiranë, më 09. 09.20 22

VENDIM

Nr. 908, Datë 09. 09. 2022

“**MBI AUTORIZIMIN E PËRQENDRIMIT TË REALIZUAR NËPËRMJET BLERJES SË AKSIONEVE TË SHOQËRISË VISHNUPRIYA FARMS PRIVATE LIMITED NGA SHOQËRITË STATKRAFT IH HOLDINGS AS DHE STATKRAFT INDIA PRIVATE LIMITED**”.

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Adriana BERBERI	Anëtar
Znj.	Rezana KONOMI	Anëtar
Z.	Durim KRAJA	Anëtar

Në mbledhjen e tij të datës 09. 09. 2022, shqyrtoi çështjen me:

Objekti: Autorizimi i përqendrimit të realizuar nëpërmjet blerjes së aksioneve të shoqërisë Vishnupriya Farms Private Limited nga shoqëritë Statkraft IH Holdings AS dhe Statkraft India Private Limited.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm mbi njoftimin e përqendrimit të realizuar nëpërmjet blerjes së aksioneve të shoqërisë Vishnupriya Farms Private Limited nga shoqëritë Statkraft IH Holdings AS dhe Statkraft India Private Limited.

VËREN SE :

I. Palët në transaksion dhe procedura

Pranë Autoritetit të Konkurrencës është depozituar njoftimi mbi përqendrimin e realizuar nëpërmjet blerjes së aksioneve të shoqërisë Vishnupriya Farms Private Limited nga shoqëritë Statkraft IH Holdings AS dhe Statkraft India Private Limited.

Bazuar në nenin 60 të ligjit nr. 9121, datë 28.07.2003 “Për mbrojtjen e konkurrencës” dhe në kërkesën e palës njoftuese për pajisjen me autorizim të përkohshëm të transaksionit të synuar për blerjen e aksioneve të shoqërisë Vishnupriya Farms Private Limited, nga shoqëria Statkraft IH Holdings AS (Statkraft), Komisioni i Autoritetit të Konkurrencës, me vendimin nr.901, datë 29.07.2022 “Mbi përqendrimin e realizuar nëpërmjet blerjes së propozuar të aksioneve të shoqërisë Vishnupriya Farms Private Limited nga shoqëria Statkraft IH Holdings AS”, vendosi:

1. Të autorizojë përkohësisht përqendrimin e realizuar nëpërmjet blerjes së propozuar të aksioneve të shoqërisë Vishnupriya Farms Private Limited nga shoqëria Statkraft IH Holdings AS.
2. Autorizimi i përqendrimit të përkohshëm do të jetë i vlefshëm deri në momentin e nënshkrimit të marrëveshjes nga palët në transaksion.
3. Pala njoftuese ka detyrimin të depozitojë pranë Autoritetit të Konkurrencës, marrëveshjen e nënshkruar nga palët pjesëmarrëse në transaksion, pas të cilës Sekretariati do të fillojë procedurën e kontrollit të përqendrimeve bazuar në nenet 53-64 të ligjit nr. 9121 datë 28.07.2003 “Për mbrojtjen e konkurrencës”

Me shkresën nr. 492/5, datë 26.08.2022 “Njoftim përqendrimi”, përfaqësuesi ligjor ka njoftuar se shoqëria Statkraft IH Holdings AS dhe Statkraft India Private Limited kanë nënshkruar “Marrëveshje për blerje aksionesh”, datë 04 gusht 2022, mbi blerjen e aksioneve të shoqërisë Vishnupriya Farms Private Limited.

Referuar Marrëveshjes, palët në marrëveshje janë:

Pala blerëse:

Blerësi 1: Statkraft IH Holdings AS, është një shoqëri, e themeluar sipas legjislacionit të Norvegjisë, dhe objekt aktiviteti: Veprimtari në fushën e ndërtimit, operimit dhe furnizimit të klientëve me energji të rinovueshme.

Statkraft IH Holdings AS është një shoqëri e zotëruar 100% nga Statkraft AS, pjesë e Statkraft Group. Grupi Statkraft është prodhuesi më i madh i energjisë së rinovueshme në Norvegji dhe prodhuesi i tretë më i madh i rajonit Nordik.

Blerësi 2: Statkraft India Private Limited, është një shoqëri, e themeluar dhe ekzistuese, sipas legjislacionit të Nju Dehli, Indi. Shoqëria kryen kryesisht operacionet e saj nga Delhi.

Shoqëria Statkraft IH Holdings AS dhe shoqëria Statkraft India Private Limited zotërohen 100% nga Grupi Statkraft.

Grupit Statkraft, është prezent në Shqipëri përmes dy filialeve të saj, Statkraft Renewables Albania SHPK dhe Devolli Hydropower SH.A.

Shoqëria Target: Vishnupriya Fams Private Limited, është një shoqëri jo-qeveritare me aksione të kufizuara sipas legjislacionit të Indisë. Shoqëria është e zotëruar nga Silvergates Holdings and Investments Private Limited (99.9%) dhe një ortak i nominuar (0.1%).

Shoqëria target nuk ka prezencë dhe nuk gjeneron xhiro në Shqipëri pasi të gjitha aktivitetet e saj bazohen vetëm në Indi.

Pala shitëse:

Shitësi 1: Silvergates Holdings & Investment Private Limited, është një shoqëri e themeluar, sipas legjislacionit të Indisë, shoqëri jo-qeveritare me aksione të kufizuara.

Shoqëria Silvergates Holdings & Investment Private Limited, është e përfshirë në aktivitete të tilla si: Ndërmjetësimi financiar, përveç sigurimit dhe pensionit, Aktivitetet e Fondeve të Ndërsjella duke përfshirë Unit Trust of India.

Shitësi 2: Z. Prashanth Krishnan, rezident dhe qytetar i Indisë.

II. Përqendrimi

Në datë 04 gusht 2022, është nënshkruar “Marrëveshja për blerjen e aksioneve”, ndërmjet shoqërisë Statkraft IH Holdings AS (blerësi nr.1), Statkraft India Private Limited (blerësi nr.2), Silvergates Holdings & Investment Private Limited (shitësi) dhe Vishnupriya Farms Private Limited (target).

Referuar marrëveshjes, shitësit së bashku zotërojnë 100% të të gjithë kapitalit aksionar të emetuar, të nënshkruar dhe të paguar të shoqërisë, e lirë dhe e pastër nga çfarëdo barrë dhe sipas nenit 2, “Shitja dhe blerja e kuotave në shitje” dhe kushteve të përcaktuara në këtë marrëveshje, Shitësi nr.1 pranon dhe gjithashtu merr përsipër shitjen, transferimin, dorëzimin e kuotave të shitësit nr.2 tek blerësit dhe blerësit. Duke u mbështetur në garancitë dhe angazhimet e shitësit nr.1, blerësit pranojnë të blejnë nga shitësit kuotat në shitje të lira dhe të pastra nga çfarëdo barrë.

Me realizimin e shitjes dhe blerjes së kuotave në shitje në datën e mbylljes, blerësit do të mbajnë 100% të kapitalit të emetuar, të nënshkruar dhe të paguar plotësisht të shoqërisë. Në datën e mbylljes, kuotat në shitje do të shiten dhe transferohen blerësve me të gjitha të drejtat, titujt, interesat dhe privilegjet e shitësve.

Referuar marrëveshjes si dhe pasqyrave financiare të palëve, transaksioni i propozuar, përbën një përqendrim në kuptim të nenit 10 dhe 12 të ligjit nr. 9121 datë 28.07.2003 “Për mbrojtjen e konkurrencës” dhe si i tillë është objekt autorizimi nga Komisioni i Konkurrencës.

III. Analiza e Konkurrencës

Mbështetur në nenin 3, pika 7, të ligjit nr. 9121, datë 28.07.2003 “Për mbrojtjen e konkurrencës”, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës i produktit do të konsiderohet tregu i prodhimit të energjisë solare (diellore), por duke qenë se transaksioni nuk do të ketë asnjë ndikim në tregun shqiptar si edhe duke iu referuar praktikave të Komisionit Evropian në çështje të ngjashme, tregu përkatës i produktit do të lihet i hapur. Treg përkatës gjeografik do të konsiderohet territori i Republikës së Shqipërisë.

Shoqëria Statkraft IH Holdings AS dhe shoqëria Statkraft India Private Limited zotërohen 100% nga Grupi Statkraft, i cili është prezent në Shqipëri përmes dy filialeve të saj, Statkraft Renewables Albania SHPK dhe Devolli Hydropower SH.A.

- Shoqëria Statkraft Renewables Albania SHPK, është shoqëri me përgjegjësi të kufizuar, e licensuar për prodhimin e energjisë nëpërmjet centraleve fotovoltaike me një kapacitet 2 MW dhe gjatë vitit 2021 ka gjeneruar 13 MWh duke zotëruar më pak se 0.1% në tregun e prodhimit të energjisë diellore.

- Shoqëria Devoll Hydropower SHA, është shoqëri aksionare me objekt planifikimin, ndërtimin, mirëmbajtjen dhe funksionimin e njësive prodhuese hidroelektrike me një kapacitet të

kombinuar të instaluar përafërsisht 319 MW në Luginën e Devollit nëpërmjet HEC-eve “Banjë” dhe “Moglicë”, të cilat kanë prodhuar gjatë vitit 2021 683 mijë MWh, duke zotëruar 8% të prodhimit të përgjithshëm të energjisë elektrike nga uji.

Vishnupriya Farms Private Limited është një shoqëri e regjistruar në Indi, aktive në prodhimin e energjisë solare. Targeti nuk është prezent dhe nuk realizon të ardhura në Shqipëri. Aktiviteti i tij fokusohet në Indi. Blerja e tij është thelbësore në ngritjen e një projekti të dytë solar në Tamil Nadu.

Përqendrimi i njoftuar nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë asnjë ndryshim dhe nuk do të ketë asnjë ndikim në tregun shqiptar

PËR KËTO ARSYE:





Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”,


VENDOSI:

1. Të autorizojë përqendrimin e realizuar nëpërmjet blerjes së aksioneve të shoqërisë Vishnupriya Farms Private Limited nga shoqëritë Statkraft IH Holdings AS dhe Statkraft India Private Limited.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS

 Leida MATJA () Zv/Kryetar	 Rezana KONOMI () Anëtar	 Adriana BERBERI () Anëtar	 Durim KRAJA () Anëtar
--	--	---	--


Denar BIBA
Kryetar